



REPUBLIKA E KOSOVËS
REPUBLIKA KOSOVA – REPUBLIC OF KOSOVO
KËSHILLI GJYQËSOR I KOSOVËS
SUDSKI SAVET KOSOVA - KOSOVO JUDICIAL COUNCIL

Republika e Kosovës Republika Kosovo Republic of Kosovo KËSHILLI GJYQËSOR I KOSOVËS SUDSKI SAVET KOSOVA KOSOVO JUDICIAL COUNCIL	01 / 1495
Prishtinë, A	28. 12. 2023

KGJK.nr.568/2023

Datë: 21 dhjetor 2023

KËSHILLI GJYQËSOR I KOSOVËS (KGJK), në bazë të nenit 108, pika 3, të Kushtetutës së Republikës së Kosovës dhe nenit 7, paragrafi 1, pika 1.14, të Ligjit Nr. 06/L-055 për Këshillin Gjyqësor të Kosovës, duke vendosur në çështjen disiplinore ndaj Luan Berisha, gjyqtar në Gjykatën Themelore në Prizren, sipas raportit të panelit hetimor Nr.AD/KGJK/05/2023-GJTHPZ-AD/GJTHPZ/6/23, të datës 27 qershor 2023, si dhe raportit plotësues për këtë lëndë disiplinore të datës 14 dhjetor 2023, të ndërlidhur me Aktvendimin e Gjykatës Supreme të Kosovës nr.AA.nr.48/2023, në pajtim me Ligjin për Përgjegjësinë Disiplinore të Gjyqtarëve dhe Prokurorëve, nenin 19 dhe 20 të Rregullores 05/2019, për Procedurën Disiplinore të Gjyqtarëve, në seancën dëgjimore të mbajtur me datë 21 dhjetor 2023, nxjerr këtë:

V E N D I M

1. **Luan Berisha**, gjyqtar në Gjykatën Themelore në Prizren, është përgjegjës për shkelje disiplinore të përcaktuara në nenin 5, paragrafi 2, nën paragrafi 2.7, të Ligjit 06/L-057 për Përgjegjësinë Disiplinore të Gjyqtarëve dhe Prokurorëve.
2. Për këtë shkelje disiplinore gjyqtarit Luan Berisha i shqiptohet sanksioni disiplinor transferim i përhershëm nga Departamenti i Përgjithshëm-Divizioni Penal të Gjykatës Themelore në Prizren në Departamentin e Përgjithshëm-Divizioni për Kundërvajtje të të njëjtës gjykatë.

A r s y e t i m

Këshilli Gjyqësor i Kosovës (më tutje Këshilli) me datë 03 prill 2023, ka pranuar nga Autoriteti Kompetent kërkesë për fillimin e hetimit disiplinor me pretendim se Luan Berisha, gjyqtar në Gjykatën Themelore në Prizren, mund të ketë kryer shkelje disiplinore nga neni 5, paragrafi 2, nën paragrafi 2.7, të Ligjit Nr.06/L-057 për Përgjegjësinë Disiplinore të Gjyqtarëve dhe Prokurorëve.

Sipas të gjeturave dhe vlerësimit të Autoritetit Kompetent gjyqtari Luan Berisha ka bërë shkelje të rëndë disiplinore duke mos ndërmarr veprimet konform përgjegjësisë së tij gjyqësore zyrtare, dhe si rrjedhojë e mangësive të konstatuara ka ardhur gjerë te humbja e besimit të publikut në vendosje të drejtë dhe në mënyrë meritore. Respektivisht sipas Autoritetit Kompetent gjatë punës së tij si gjyqtar ka qenë i ngarkuar me 668 lëndë të cilat i kishte pranuar në mënyrë proporcionale si çdo gjyqtar tjetër i divizionit penal në Gjykatën Themelore në Prizren.

Sipas vlerësimit të autoriteti gjatë punës së tij si gjyqtar nuk ka mundur ta organizoj dhe menaxhoj punën e tij rreth caktimit dhe organizimit të detyrave të punës kështu që bazuar edhe në raportet e paraqitura nga vet subjekti i hetimit janë parashkruar një numër i konsiderueshëm i lëndëve penale. Në bazë të verifikimit të Autoritetit Kompetent bërë subjektit të hetimit në vitin 2013 i janë parashkruar 30 lëndë me parashkrim relativ (absolut), në vitin 2014 i janë parashkruar 19 lëndë, në vitin 2015 i janë parashkruar 38 lëndë nga këto 30 lëndë me parashkrim relativ dhe 8 lëndë me parashkrim absolut, në vitin 2016 i janë parashkruar 65 lëndë, prej tyre 50 lëndë me parashkrim absolut dhe 15 lëndë me parashkrim relativ dhe pa asnjë veprim të ndërmarr. Nga kjo gjendje në total për katër (4) vite 2013, 2014, 2015, 2016, subjektit të hetimit i janë parashkruar 152 lëndë gjyqësore, dhe janë edhe 214 lëndë që për shkak të periudhës së gjatë të kaluar pa ndërmarr asnjë veprim pritet që të nxjerrën vendime për parashkrim. Prandaj bazuar në këto të gjeturat ka vlerësuar se ka bazë për iniciimin e procedurës disiplinore dhe kërkoi nga KGJK themelimin e panelit hetimor.

Këshilli Gjyqësor i Kosovës, me datë 06 prill 2023 ka themeluar panelin hetimor i cili panel ka zhvilluar hetimet dhe me datë 27 prill 2023 i ka dorëzuar KGJK-së raportin mbi faktet dhe provat e mbledhura si dhe marrëveshjen vullnetare për pranimin e fajësisë të arritur në mes të panelit hetimor dhe subjektit të hetimit gjyqtarit Luan Berisha si dhe sanksionin disiplinor zvogëlim i pagës për 30% për periudhën kohore për një (1) vit.

Me datë 28 korrik 2023, KGJK ka mbajtur seancë dëgjimore, pa prezencën e kryesuesit të panelit hetimor dhe subjektit të hetimit. Në seancën dëgjimore të datës 21 shtator 2023, KGJK ka vendosur për përgjegjësinë disiplinore të subjektit të hetimit në atë mënyrë që subjekti i hetimit është shpallur përgjegjës për shkelje disiplinore të nenit 5, paragrafi 2, nën paragrafi 2.7 të Ligjit 06/L-057 për Përgjegjësinë Disiplinore të Gjyqtarëve dhe Prokurorëve.

Për shkeljen e theksuar i ka shqiptuar sanksionin disiplinor zvogëlim i përkohshëm i pagës për 20% për periudhën kohore prej 1 (një) viti, dhe transferim i përhershëm nga Departamenti i Përgjithshëm – Divizioni Penal të Gjykatës Themelore në Prizren, në Departamentin e Përgjithshëm – Divizioni për Kundërvajtje i të njëjtës gjykatë.

Subjekti i hetimit i pakënaqur me vendimin e KGJK ka shfrytëzuar të drejtën e ankesës në Gjykatën Supreme ndërsa Gjykata Supreme me aktvendimin AA.nr.48/203, të datës 08.11.2023, e ka pranuar si të themeltë ankesën e subjektit të hetimit, e ka prishur vendimin e KGJK- dhe e ka kthyer në rishqyrtim çështjen.

KGJK, pas pranimit të vendimit të Gjykatës Supreme ka kërkuar plotësimin e raportit të panelit të hetimit për çështjet që ka rekomanduar Gjykata Supreme, ndërsa paneli i hetimit me datën 14.12.2023 e ka plotësuar raportin duke ia dorëzuar të njëjtin KGJK-së.

Në procedurë të rregullt, KGJK me datën 21 dhjetor 2023, ka mbajtur seancë dëgjimore në të cilën ka prezantuar kryesuesja e panelit hetimor dhe subjekti i hetimit gjyqtari Luan Berisha. Në këtë seancë përveç provave të administruara në procesin e mëparshëm në këtë çështje disiplinore është marrë në administrim edhe raporti plotësues duke ju dhënë njëkohësisht mundësia edhe kryesueses së panelit dhe gjyqtarit subjekt i hetimit që të shprehin pikëpamjet e tyre me rastin e rishqyrtimit të çështjes.

Kryesuesja e panelit hetimor në seancën dëgjimore ka referuar çështjen që ka trajtuar paneli duke theksuar se pasi që është refuzuar marrëveshja për pranimin e fajësisë të arritur në mes të panelit dhe subjektit të hetimit në procesin e mëparshëm, është hartuar raporti i hetimit dhe pas kthimit të çështjes nga Gjykata Supreme është hartuar edhe raporti plotësues nga ka rezultuar se gjyqtarit i janë parashkruar çështjet me të cilat ka qenë i ngarkuar dhe atë: të vitit 2013 i janë parashkruar 30 lëndë, të vitit 2014 i janë parashkruar 19 lëndë, të vitit 2015 janë parashkruar 38 nga këto 30 lëndë me parashkrim relativ dhe 8 më parashkrim absolut, në vitin 2016 janë parashkruar 65 lëndë, prej tyre 50 lëndë me parashkrim absolut dhe 15 lëndë me parashkrim relativ pa u ndërmarrë asnjë veprim. Nga kjo gjendje në total për vitet 2013, 2014, 2015 dhe 2016, subjektit të hetimit i janë parashkruar 152 lëndë gjyqësore dhe janë edhe 214 lëndë, që për shkak të periudhës së gjatë të kaluar rreth 24 muaj, pa u ndërmarrë asnjë veprim dhe pritet që të nxirren vetëm vendimet për parashkrim.

Ndërsa subjekti i hetimit në seancën e datës 21 dhjetor 2023, ka deklaruar se e pranon fajësinë duke e arsyetuar me mbingarkesën me lëndë gjyqësore si dhe angazhimin e tij si anëtarë në trupat gjykues në seancat gjyqësore në Gjykatën Themelore në Prizren. Më tej, subjekti i hetimit thekson se këto lëshime nuk janë bërë me dashje as me qëllim, dhe nuk do të përsëriten më. I njëjti ka deklaruar se është vlerësuar mirë për punën që e ka kryer si gjyqtar, nga komisioni për vlerësim. Ka shtuar se nga momenti kur menaxhmenti i gjykatës e ka mbështetur me staf profesional në kohën e fundit gjendja është përmirësuar dukshëm në zyrën e tij, gjë që nënkupton se gjendja e mëparshme është krijuar si shkak i mbingarkesës dhe përfshirjen e gjyqtarit në shume aktivitete brenda gjykatës, prandaj pavarësisht përpjekjeve maksimale të tij ka qenë pamundur të evitohet gjendja e krijuar. Në këtë kuptim i ka kërkuar KGJK-së që të ketë në konsideratë faktin se gjyqtari është me eksperiencë të gjatë, gjatë tërë karrierës së tij ka demonstruar sjellje me integritet të lartë dhe nuk është përfshirë në asnjë shkelje disiplinore. Kjo gjendje ka qenë një befasi edhe për vet gjyqtarin, pasi që nuk e ka menduar që mund të përballet me situatën e krijuar.

Në këtë çështje janë lexuar këto prova: Njoftimin e Kryetares Shpresa Emra drejtuar gjyqtarit Luan Berisha të datës 10.03.2023; Emailat e komunikimit të Kadire Rexha, bashkëpunëtore profesionale në Gjykatën Themelore në Prizren; sa i përket raporti me lëndët e ngarkuara gjatë viti 2022 të gjyqtarit Luan Berisha të datave 23.01.2023, 12.01.2023, 16.01.2023; Emailat e komunikimit të Kryetares Shpresa Emra me gjyqtarët e Gjykatës Themelore në Prizren të datës 24.02.2023, sa i përket zgjidhjes së lëndëve me prioritet sipas Strategjisë së KGJK për zgjidhjen efikase të lëndëve të korrupsionit dhe krimit të organizuar për vitet 2022-2024; raportit me lëndët në punë të gjyqtarit Luan Berisha të vitit 2008-2022; Raporti për lëndët më të vjetra se 24 muaj të Gjyqtarit Luan Berisha; Deklarata e gjyqtarit Luan Berisha për Autoritetit Kompetent lidhur me kërkesën sa i përket pretendimeve për parashkrim të lëndëve penale; Lista e lëndëve më të cilat ka qenë anëtar i trupit gjykues gjyqtari Luan Berisha për vitet 2019, 2020, 2021; Raporti i datës 10.05.2023 për lëndët kryera; Raporti i Kryetares së Gjykatës në Prizren i bërë sipas kërkesës së panelit hetimor për verifikimin e lëndës dërguar me email me 01.06.2023; Raporti i vlerësimit të performancës së subjektit të hetimit për periudhën 2016-2018; Raporti i vlerësimit të performancës së subjektit të hetimit për vitet 2019-2021; Raporti vlerësimit të subjektit të hetimit për fazën e dytë e vlerësimit të performancës 2019-2021; Raporti i kërkesë me lëndë të Gjyqtarit (emaili i Kryetares së Gjykatës Shpresa Emra për vitet 2016-2022); Procesverbalin e kolegjiut të Gjykatës Themelore në Prizren të datave 06.07.2020, 24.12.2020, 16.04.2021, 24.12.2021, 04.05.2022, 13.07.2022, 29.08.2022, 20.10.2022, 21.12.2022; Statistikat lidhur me lëndët e kryera për vitin 2016-2018 dhe vitet 2019-2021; Raporti plotësues i panelit hetimor i datës 14.12.2023, dhe tabela me lëndët e

subjektit të hetimit për vitet 2013, 2014, 2015 dhe 2016, si dhe aktvendimet me të cilët subjekti i hetimit i ka parashkruar lëndët penale.

Këshilli ka gjetur se subjekti i hetimit gjyqtari Luan Berisha është përfshirë në shkelje disiplinore të rëndë siç ka pretenduar Autoriteti Kompetent duke mos ndërmarrë veprimet e nevojshme për procedim të lëndëve penale konform dispozitave ligjore. Duke u bazuar në raportet statistikore lidhur me ngarkesën me lëndë është vërtetuar se nga numri i lëndëve me të cilat ka qenë i ngarkuar gjyqtari në periudhën prej katër viteve janë parashkruar 152 lëndë të viteve si në vijim: të vitit 2013 i janë parashkruar 30 lëndë, të vitit 2014 i janë parashkruar 19 lëndë, të vitit 2015 janë parashkruar 38 nga këto 30 lëndë me parashkrim relativ dhe 8 lëndë me parashkrim absolut, në vitin 2016 janë parashkruar 65 lëndë, prej tyre 50 lëndë me parashkrim absolut dhe 15 lëndë me parashkrim relativ pa u ndërmarrë asnjë veprim. Nga kjo gjendje në total për vitet 2013, 2014, 2015 dhe 2016 e gjithashtu për shkak se ka kaluar periudha prej 24 muajve pa ndërmarr veprimet e duhura, pritet që të nxjerrën vendime për parashkrimin edhe të 214 lëndëve tjera penale.

Lëndët e parashkuara në total prej 152, prej të cilave nuk janë ndërmarrë veprime janë parashkruar dhe janë në vitet si në vijim: në vitin 2013 – 1 lëndë, në vitin 2014 – 1 lëndë, në vitin 2015 – 1 lëndë, në vitin 2016 – 6 lëndë, në vitin 2017 – 13 lëndë, në vitin 2018 – 5 lëndë, në vitin 2019 – 25 lëndë, në vitin 2020 – 28 lëndë, në vitin 2021 – 36 lëndë, në vitin 2022 – 21 lëndë, në vitin 2023 – 6 lëndë, ndërsa 9 lëndë ka qenë e pamundur të konstatohet data e parashkrimit por shkak të mos gjenerimit nga sistemi elektronik i dosjes, bashkimit të lëndëve apo arsye të tjera.

Në këtë rast KGJK konstaton se duke vepruar edhe në përputhje me rekomandimin e gjykatës supreme rezulton se nga totali prej 152 i lëndëve të parashkuara, 121 janë parashkruar në 5 vitet e fundit mirëpo pavarësisht kësaj gjyqtari mban përgjegjësi për të gjitha lëndët e parashkuara për shkak se të njëjtat i ka mbajtur në zyre edhe pas datës së parashkrimit pa ndërmarrë veprimet përkatëse në këtë rast vendimin mbi parashkrimin. Për ta qartësuar në rastin konkret është vlerësuar përgjegjësia e gjyqtarit për 121 lëndët e parashkuara në 5 vitet e fundit që nënkupton se në asnjë mënyrë nuk është parashkruar shkelja disiplinore, por në vlerësimin e KGJK-së gjyqtari mban përgjegjësi edhe për pjesën tjetër të lëndëve në të cilat ka kaluar afati prej 5 viteve nga momenti i parashkrimit e deri të momenti i fillimit të procedurës disiplinore pasi që gjyqtari rastet i ka mbajtur në zyrë pa i nxjerr vendimet e parashkrimit dhe rrjedhimisht u ka pamundësuar palëve të dëmtuar që të fillojnë kontestet në procedurë civile.

Në këtë rast, KGJK ka konstatuar se gjyqtari ka dështuar të administroj zyrën dhe rrjedhimisht të përshtat angazhimin e tij varësisht nga vëllimi i ngarkesës dhe i prioriteti brenda zyrës.

Nuk është kontestuese se gjyqtari subjekt i hetimit ka qenë i angazhuar edhe në Departamentin e Krimeve të Rënda në shumë çështje gjë që ka ndikuar pashmangshëm edhe në efikasitetin e punës se tij në Departamentin e Përgjithshëm-Divizioni Penal, mirëpo ka qenë në përgjegjësinë e gjyqtarit që ti caktoj prioritetet dhe në këtë rast prioritet ka qenë evitimi i parashkrimit të lëndëve.

Si rrjedhojë e kësaj gjendje është humbur besimi i publikut në vendosje të drejtë dhe është humb mundësia që të vendoset në mënyrë meritore për lëndët e parashkuara.

Bazuar në raportet statistikore të pranuar nga zyrat kompetente, KGJK po ashtu ka gjetur se subjekti i hetimit gjyqtari Luan Berisha ka qenë i ngarkuar me lëndë në mënyrë proporcionale sikurse të gjithë gjyqtarët tjerë të divizionit penal të Gjykatës Themelore në Prizren, mirëpo nuk ka organizuar punën dhe nuk kishte ndërmarrë veprime konkrete me qëllim të shfrytëzimit të plotë

dhe efikas të orarit të punës, ku në rastin konkret ka dështuar në kryerjen e detyrave të tij si gjyqtar.

Veprimet e gjyqtarit Luan Berisha i kanë cenuar parimet bazë të funksionimit të sistemit gjyqësor dhe përgjegjësisë që ka gjyqësori, për të promovuar vlerat e trajtimit të barabartë të qytetarëve para ligjit dhe para gjykatës si dhe vlerat e publikut që të besojnë në drejtësi të paanshme.

Shkeljet e sipër theksuara janë provuar me provat e administruara, të cilat i janë prezantuar edhe KGJK-së nga raportet fakt mbledhëse të panelit hetimor. Këto raporte të panelit janë vlerësuar të besueshme pasi që paneli, në mënyrë objektive dhe sipas procedurës së përcaktuar ligjore, ka zhvilluar procesin e hetimit të çështjes dhe konstatimit të fakteve. Këshilli ka vlerësuar pretendimet e subjektit, por ka gjetur se në kuptim të fakteve të konstatuara me provat e administruara, këto pretendime dhe deklarata nuk kanë ndikuar që KGJK të marrë një vendim tjetër. Në seancën për këshillim dhe votim, KGJK në mënyrë unanime konstatoj se subjekti i hetimit gjyqtari Luan Berisha është përgjegjës për shkelje disiplinore të përcaktuara në nenin 5-shkelje disiplinore për gjyqtarë, paragrafi 2-shkeljet e detyrave të gjyqtarit qoftë me dashje qoftë nga pakujdesia e rëndë, dhe nën paragrafi 2.7-në vazhdimësi nuk i kryen detyrat me kohë, siç kërkohet me ligj, të Ligjit 06/L-057 për Përgjegjësinë Disiplinore të Gjyqtarëve dhe Prokurorëve dhe nenit 5-funksioni i gjyqtarit ka prioritet kundrejt të gjitha aktiviteteve tjera të gjyqtarit, dhe 5.2, -gjyqtari është i detyruar që të organizoj punën brenda orarit të punës me qëllim të shfrytëzimit të plotë dhe efikas të orarit të punës, të përcaktuara në Kodin e Etikës Profesionale për Gjyqtar.

Këshilli shqyrtoi të gjitha rrethanat në të cilat ka vepruar gjyqtari si subjekt i hetimit dhe në përputhje me Ligjin Nr.06/L-057 për Përgjegjësinë Disiplinore të Gjyqtarëve dhe Prokurorëve, ka vlerësuar se masë adekuate për këtë shkelje disiplinore të konstatuar është sanksioni transferim i përhershëm nga Departamenti i Përgjithshëm - Divizioni Penal të Gjykatës Themelore në Prizren në Departamentin e Përgjithshëm - Divizioni për Kundërvajtje të të njëjtës gjykatë, për të cilat Këshilli ka vlerësuar se janë në përputhje të plotë me shkeljet e konsumuara.

Masën disiplinore të degradimit – transfer i përhershëm nga Departamenti i Përgjithshëm-Divizioni Penal të Gjykatës Themelore në Prizren në Departamentin e Përgjithshëm - Divizioni për Kundërvajtje të të njëjtës gjykatë, Këshilli e ka vlerësuar si sanksion të përshtatshëm dhe adekuat duke marrë parasysh natyrën e lëndëve të cilat shqyrtohen dhe trajtohen në këtë divizion. Në bazë të raportit të panelit hetimor por edhe vet deklarimit të subjektit të hetimit gjyqtarit Luan Berisha është konstatuar se i njëjti për vite të tëra ka neglizhuar punën si Gjyqtar në Departamentin e Përgjithshëm Penal dhe në vijueshmëri ka pas parashkrim të lëndëve, me çka nën rrethanën e tillë vazhdimi i punës se të njëjtit gjyqtar pran departamentit ku ka punuar gjer me tani do të ishte tërësisht i paarsyeshëm, pasi që gjyqtari lehtësisht do të përsëriste të njëjtat shkelje.


Si rrethanë lehtësuese me rastin e shqiptimit të sanksioneve disiplinore, KGJK mori atë se subjekti i hetimit nuk ka qenë asnjëherë në procedurë disiplinore dhe se i njëjti ka shprehur keqardhje lidhur me situatën e ndodhur dhe ka premtuar para KGJK-së se nuk do të lejoj që të përsëritet situatë e njëjtë.

Masa disiplinore e shqiptuar sipas vlerësimit të KGJK-së është masë proporcionale me shkeljen e konsumuar nga ana e subjektit të hetimit duke siguruar kështu zbatimin e përgjegjësisë ligjore që ka Këshilli në procedurën disiplinore ndaj gjyqtarëve e cila procedurë bazohet në Ligjin për Përgjegjësinë Disiplinore të Gjyqtarëve dhe Prokurorëve. Masa disiplinore sipas Ligjit 06/L-057 për Përgjegjësinë Disiplinore të Gjyqtarëve dhe Prokurorëve, duhet të jetë masa e cila ndikon te

gjyqtari subjekt i hetimit që ti korrektoj veprimet, gjatë ushtrimit të funksionit të tij si gjyqtarë.

Nga se u tha më lartë, konform nenit 7, paragrafi 1, nën paragrafi 1.3, 1.4, dhe paragrafi 2 nën paragrafi 2.1, 2.2, dhe 2.5 të Ligjin Nr.06/L-057 për Përgjegjësinë Disiplinore të Gjyqtarëve dhe Prokurorëve u vendos si në dispozitiv të këtij vendimi.

Këshilli Gjyqësor i Kosovës
KGJK.nr.568/2023, datë: 21 dhjetor 2023



Këshillë Juridike:

Kundër këtij vendimi pala e pakënaqur ka të drejtë ankese drejtpërdrejtë në Gjykatën Supreme të Kosovës, brenda 15 ditëve nga pranimi i vendimit.

Kopje e vendimit i dërgohet:

- *Shpresa Emra, Kryetare në Gjykatën Themelore në Prizren;*
- *Luan Berisha, Gjyqtar në Gjykatën Themelore në Prizren.*